

REGIONAL NEWS

HEADLINES:-

1. Lai Autonomous District Council Inthlan chu vawiin khan boruak nuam tak hnuaiah mipuiten zalen takin Vote an thlak a, hriattheih chin ah vote zaa 68.38 a tla a ni.
2. Sports Minister Pu Lalngchinglova Hmar in Mizoten infiamnaah tun aia dinhmun sang zawk an thlen theih nan Sawrkarin theihtawp a chhuah dawn tih a sawi.
3. Social Welfare Minister Pi Lalrinpui'n pianphunga rualbanlo, vohbikte pualin sorkarin hmasawna tur hmachhawp a kalpui mek tih a sawi.
4. Union Information and Broadcasting Minister Ashwini Vaishnaw chuan chanchin thar dik lo thehdarh chu mipui rorelna democracy tana thil hlauhawm tak a ni a ti..

<><><>

LADC POLL

Lai Autonomous District Council Inthlan chu vawiin khan boruak nuam tak hnuaiah mipuiten zalen takin Vote an thlak a, hriattheih chin ah vote zaa 68.38 a tla a ni.

Tukin dar 7 atangin LADC huamchhunga MDC bial 25 a Polling Station 111 ah tluang tak in Vote thlak a ni a, hriat theih chinah mipa vote thlak 19225 awmin hmeichhe vote thlak 19667 an awm a, vote tla zawng zawng hi 38892 niin za zela 68.38 vote a tla a ni.

LADC inthlana Lungtian-II Polling Station a First Polling Officer Pu Israel MS Dawngliana, kum 43 Lawngtlai Council Veng chu tukin khan an kaitho zo lo a, Pu Israel MS Dawngliana hi LADC a Planning & Programme Implementation Department a LDC niin, vawiin khan a ruang hi Lawngtlai panpui a ni.

District Election Officer Pu Donny Lalruatsanga chuan Pu Israel MS Dawngliana boral chu pawitih thu sawiin chhawmdawlina awm thei ang ngaihtuah a nih tur thu a sawi a, Lungtian-II, Polling Station ah pawh Inthlanna tluang takin kalpui zui a nih thu a sawi.

Bial 25 awmna LADC ah hian Vote nei 56,873 awmin Candidate 80 an awm a, ZPM chuan bial awm zawng zawng bial 25 an chuh kim a, MNF in bial 20 ah Candidate neiin, Congress in bial 14 ah Candidate an nei a, BJP in bial 10 Candidate neiin Independent a chuh mi 11 an awm bawk.

Inthlanna buaipuituten vawiin tlai atang khan Inthlanna na hmanrua te Lawngtlai panpui nghalin, Government Lawngtlai College a Pindan ah Inthlanna hmanruate hi dahluh niin, December 9, karleh Thawhlejni zing dar 8 atangin Vote tlate hi chhiar a ni ang.

<><><>

GOVERNOR

Larsap General (Rtd) Vijay Kumar Singh chuan hmarchhakah tunhma zawnga thleng ngai lo hmasawna ruhrel lian tham tak hmun hrang hrangah siam ani a ti.

Nimina New Delhi khawpuia GeoSmart World Conference & Expo 2025 hnuuia North East Conclave ah he thu hi a sawi a, Larsap chuan hmarchhak bial chu India hmun dangte hmasawna nen thlunzawm tlat a ni tih sawiin hmasawna ruhrel tam tak din ani tawh tih a sawi.

Larsap chuan India ram hmasawn zelah Mizoram pawimawh bikna sawiin, Mizoram chu ramngaw hausa tak, hnam ziarang hausa leh hmun pawimawh taka awm a nih thu a sawi a. Hmun awih leh rualrem lo, lirngching thlen duhna leh tlang hrang hranga tlem te tea inbawk hrang thliah niin hengte avang hian ruahmanna siam kawngah khawl changkang leh tha bakah thiamna sang ber mamawh a nih thu a sawi.

Agroforestry, mau sawngbawlina, renewable energy, ecotourism, horticulture leh kutthemthiamna lamah Mizoram-in theihna sang tak a neih thu sawiin, khawl thiamna hmanga hmasawna thlen belh theih a nih thu a sawi a. Awmze nei a lo neih, lei that leh that loh enfiah, thlai thar theih zat tur zirna leh tangkai taka ram hmante chu kum tin lo neih sawn thin leh kan vela thil awmte rualkhai taka awm tlan theihna atana pawimawh a nih thu a sawi tel bawk.

<><><>

SPORTS INCENTIVE CASH AWARD

Sports & Youth Services Department buatsaihin khawvel huap leh ram pum huapa infiamnaa Mizoram tana Gold, Silver leh Bronze Medal late hnenah vawiin khan Sports Incentive Cash Award cheng nuai 94, singkhat, sangkua, zakua, sawmhni leh panga sem a ni.

Vawiina Woodland Hills, Zonuam a Sports Incentive Cash Award hlan te hi kum 2024 April ni 1 atanga kumin March ni 31 inkara National leh International level-a infiamna Discipline hrang hrang 15 ah Mizoram tana Gold, Silver leh Bronze Medal la infiammi mipa 150 leh hmeichhia 68, an vaiin mi 224 te an ni a, infiammi te bakah Team Official-te tan award 41, a vaiin chawimawina 265 sem a ni a, Sports & Youth Services Minister Pu Lalnghinglova Hmar chuan Award hi a hlan a ni.

Mizoram Sports Incentive Cash Award Scheme, 2025 hi kumin February thla khan sem ani dawn tih hriattirna chhuah a ni a, kumina Award dawng tur thlanna atan Scheme hlui 2022 leh a thar 2025 hmang kawpin, infiammite tana a hlawk thei tur lai hman a ni a. Lawmman pakhat aia tam late an awm avangin lawmman dawngtu chu mi 218 (Mipa 150 leh Hmeichhia 68) an ni.

<><><>

SPORTS MINISTER

Sports & Youth Services Minister Pu Lalnghinglova Hmar in Mizoten khawvel huap leh ram pum huap infiamnaah tun aia dinhmun sang zawk an thlen theih nan December thla hian khawvel huapa mithiam Mizoramah chah luh a ni dawn tih a sawi a ni.

Vawiina Woodland Hills, Zonuam a Sports Incentive Cash Award hlannaah he thu hi sawiin, Sports Minister chuan Mizote'n infiamna an tuipui ang hu leh an thawm a nat ang huin infiamna lama Mizoram dinhmun chu a la hniam hle a ti a. National Games-a Mizoram dinhmun an thlir chuan an ropui lo hle a, 28-na a ni pha tawk a, India-ah a hniam pawl a ni tih sawiin, hei vang hian kalphung thlak a ngai a ti a, hmasawn

turin a bul thut atanga tan leh a ngai dawn tih sawiin naupang kum 8 atanga kum 15 inkar te tana siam Empowering Mizoram Sports hnuaiah game chawikan leh zual bik tur 8 an thlang a ti a, National Games a Mizoram hnuk hnai theitu a nih an beisei avangin theihtawp an chhuah dawn tih a sawi bawk a ni.

Sports Minsiter chuan Mizoram dinhmun chu an pawm a ngai tih sawiin, Olympic-ah medal an la beisei ngam lova, tel phak nih chauh a la ni a ti a, EMS in a tum ber chu Olympics 2036-ah Mizo infiammi a tam thei ang ber tel tir ve thei turin hma an la dawn a ti a, thla thar December ni 15 hian khawvel huapa mithiam Japan-a centre for coaching excellence deputy director nilai Prof Masamitsu chu Mizoramah lo kalin infiammite zirtirtu tur coach te a zirtir dawn a, hemi hmang hian danglamna thlen chhoh tir an tum dawn tih a sawi.

Sports Minister chuan infiamna-ah Tribal quota a awm ve loh avangin tih tak takna nen inbuatsaih a ngai a ti a, Sports hmasawna tura rawtna thlen duh an awmna nih chuan an dawng thei reng tih a sawi bawk.

<><><>

INTERNATIONAL DAY FOR PERSONS WITH DISABILITIES

Social Welfare Minister Pi Lalrinpuii'n pianphunga rualbanlo, vohbikte pualin sorkarin hmasawna tur hmachhawp a kalpui mek tih a sawi.

Social Welfare department bakah SELCO, ALYMCO, ZEP, NIELD, Directorate of AYUSH leh Persons with Disabilities lama tlawmngai pawla thawktu tangho ten an buatsaih, International Day for persons with Disabilities puala Dawrpui Multipurpose Hall, Aizawla vawiina hun hmannaah he thu hi a sawi a, Pi Lalrinpuii chuan pianphunga rualbanlo, vohbikte tan sorkar chuan hmasawna tur hmachhawp a kalpui mek thu leh vohbikte chu ngaih pawimawh an nih zia a sawi a, SELCO Foundation leh Mizoram sawrkar thawhhona chu ropui a tih thu sawiin, tunlai thiamna avanga hmasawna hmuh theih khawpa lang chu chhuanawm a tih thu a sawi a. Sawrkarin vantlang hmunte chu rualbanlote tan awlsam zawka an chet theihna tura ruahman zel a tum tih sawiin India ram pum huap infiamna lamah Mizoram aiawh rualbanlo ten lawmman an la thei chu chhuanawm a tih thu sawiin, Vohbikte chu theihtawp an chhuah phawt chuan eng kawngah pawh sang tak an thleng thei tih inhre reng turin a chah a ni.

He hunah hian Khualzahawm State Commissioner for Persons with Disability Pi Vanlaldiki Sailo pawhin thusawiin, Mizorama Vohbikte dinhmun hmasawn mek leh hmalam huna sorkar leh tlawmngai pawl hmalaknate ngaihven a chhawr tangkai turin kalkhawm te leh rualbanlo te chu a sawm a ni.

Kuminah hian United Nations chuan thupui bik- Rualbanlo te huapzo khawtlang hmasawna tih a ruat a, tukin khan International Day for Persons with Disabilities pual hian Rally neih a lo ni a, District hrang hrangah he ni pual hian hun hman a ni bawk.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

CAMPA GOVERNING BODY

Chief Minister Pu Lalduhoma'n Thenzawl Peace City atana siam tumna kal mekah Master Plan siam mek a ni a ti a, rel kawng kalna tur pawh tihchian thuai a rinawm thu a sawi.

CM Conference Hall-a CAMPA Governing Body Meeting ah he thu hi sawiin Chief Minister chuan Thenzawl Peace City Master Plan siam mekah rel kawng kalna tur chu an tichiang tep tawh tih sawiin hemi tihfel hma chu Thenzawlah hmalak rihlo ni se a ti baw.

Chief Minister chuan, ramngaw siam thar kawngah chak zawka hmalak a ngaih thu sawiin Mizoram a lo mawi deuh deuh theih nan state tree Herhse chu phun uar a pawimawh a ti a, ramngaw siam thei thlai chin uar a pawimawh thu a sawi baw.

Meeting report-a a lan danin, kum 1990 atanga kumin thlengin Mizoramah Forest ram Hectare 11,768-a zau chu Non - forest area ah chantir a ni tawh a. Heng ramngaw an tihchhiat rulh lehna tur hian hmasawna hnathawktu ten danin a phut angin PARIVESH portal kaltlangin National CAMPA ah pawisa an chhunglut thin a, Ramngaw rulhna tur an chhunluh zaa 90 chu National CAMPA hian hnathawhna state Compensatory Afforestation Fund ah dah luh zel a ni.

<><><>

MPTA

Mizoram Primary Teachers' Association (MPTA) ten zirlai harsate tanpuina Student Endowment Fund chu vawiin khan Zarkawt Community Hall-ah an sem.

Kumin hi MPTA ten student endowment fund an sem tum thumna a ni a, MPTA te chuan zirlai lehkhah thiam thei khawsak harsa te chu tanpuina dawng tur hian an zawng chhuak a, vawiina Student Endowment Fund semna hun hi Joint Headquarters pakhat leh Sub-Headquarters 18 atangin zirlai pahnih theuh an vaiin 38 an thlang chhuak a, heng mite hi vawiin khan tanpuina hlan an ni a, School Education Director Pi Angela Zothanpuui chuan zirlai harsate tanpuina semna hun hi a hmanpui a ni.

Tanpuina dawng tur zirlai thlan chhuahte hi a then chu thingtlang kilkhawr tak taka awm te an ni a, Aizawl khawpui chhung hmun pawimawh chi hrang hrang Science centre, Aizawl lungdawh leh Millennium Centre bakah zan lamah Krismas puala Aizawl khawlai cheimawi te fanpui an ni.

<><><>

PRESIDENT

President Droupadi Murmu chuan pianphunga rualbanloten midangte anga enkawlana inangtlang an dawn hunah khawtlangin hma a sawn thei chauh ang a ti. Vawiina National Award for the Empowerment of Persons With Disabilities, New Delhi-a a semnaah he thu hi sawiin Pi Murmu-i chuan heng rualbanlote hian khawngaih aiin zahna leh dik taka enkawl an mamawh zawk a ti baw. Vawiin inkhawmah hian President hian rualbanlote chawikanna tura hna thawk tha mimal leh pawlte hnenah chawimawina a hlan a. Pi Murmu-i heng mi chhuanawm tak takte hi mite thinlunga thusawitu an nih thu a sawi a ni. President Murmui chuan rualbanlote dawmkan nan sawrkarin infiamna a hmang tangkai hle tih a sawi baw a ni

<><><>

UNION I&B

Union Information and Broadcasting Minister Ashwini Vaishnaw chuan chanchin thar dik lo thehdarh chu mipui rorelna democracy tana thil hlauhawm tak a ni a ti. Vawiina Lok Sabha zawhna leh chhanna hunah zawhbelhna chhangin Pu Vaishnaw chuan social media, chanchinthar dik lo leh AI hmanga a tak ang taka siam thilte lakah khawng taka hmalak a tul a ti a. Pu Vaishnaw chuan AI hmanga inbumna thil siam hrang hrangte chhuai chhuak tur leh hremna pe thei tur dan siam mek a nih thu a sawi a. Sawrkar mai bakah Press Council of India te chu tangduna TV channel emaw chanchinbu lamah emaw hetiang inpuhna thlengte uluk zawka vil turin a chah a ni.

<><><>